



**RATU Elizabeth diperkenalkan kepada pelajar BMI yang menganggotai Persatuan Seni Silat Gayung Laksamana Malaysia oleh Idris Jusoh sebelum baginda berangkat pulang selepas mengunjungi Institut berkenaan di Kuala Lumpur, semalam.**

## Ratu Elizabeth kunjungi Institut British-Malaysia

**KUALA LUMPUR 23 Sept.** — Ratu Elizabeth II menamatkan aktiviti lawatan hari terakhirnya ke Malaysia dengan melakukan kunjungan ke Institut British-Malaysia (BMI) di sini, pagi ini.

Baginda yang diiringi oleh Menteri Pendidikan, Datuk Seri Mohd. Najib Tun Abdul Razak selaku menteri pengiring disambut oleh Timbalan Menteri Pembangunan Usahawan, Datuk Idris Jusoh di pekarangan BMI.

Ketibaan baginda diiringi oleh paluan kompong, deretan bunga manggar dan persembahan seni mempertahankan diri oleh sepuluh pelajar BMI dari Persatuan Seni Silat Gayung Laksamana Malaysia.

Rombongan diraja itu terlebih dahulu dibawa menyaksikan projek kemahiran tinggi berasaskan Kejuruteraan dan Teknologi Maklumat (IT) yang diusahakan oleh para pelajar BMI.

Baginda turut dibawa

melihat model baru kampus BMI yang bakal dibina di Kilometer 12, Gombak (bersebelahan kampus Universiti Islam Antarabangsa).

Menurut Idris, kolej baru itu yang dijangka siap pada Januari tahun 2000 mampu menempatkan 1,000 pelajar berbanding 560 orang yang ada sekarang.

“Kawasan pembinaan-nya telah diratakan sementara projek pembangunannya akan dimulakan pada bulan hadapan,” katanya kepada pemberita.

Idris percaya, kunjungan Ratu Elizabeth ke BMI mampu meningkatkan keyakinan syarikat pelabur dari Britain untuk terus menaja tenaga pengajar Malaysia melanjutkan pelajaran ke negara itu menerusi usaha sama berkenaan.

“Baginda nyata gembira dengan kualiti pelajar BMI yang mampu bertutur dalam Bahasa Inggeris dengan baik di samping kelengkapan peralatan

pembelajaran berteknologi tinggi yang disediakan di sini.

“Baginda juga nampaknya puas hati dengan kerjasama yang diberikan oleh beberapa syarikat Britain seperti British Airways, Rolls Royce dan British Aerospace yang sempat ditemuinya,” katanya.

BMI ialah sebuah institusi pengajian yang dibangunkan oleh Majlis Amanah Rakyat (Mara) pada tahun 1993 yang pada awalnya dikenali sebagai Politeknik Tuas.

Bagaimanapun, hasil hubungan baik antara kedua-dua negara, satu Memorandum Persefahaman (MoU) mengenainya telah dimeterai antara Mara dan kerajaan Britain pada April tahun lepas.

Ratu Elizabeth yang turut ditemani suaminya, Duke of Edinburgh, Putera Phillip telah menyempurnakan upacara penutup temasya Sukan Komanwel ke-16 pada 21 September lepas akan berangkat pulang malam ini.